

Моҳигул ҚОСИМОВА

БАХТ ОҒУШИ

Қарши
«Насаф» нашриёти
2006


Бахтнинг манзили кимгадир яқин, ким учундир олис. Олис манзилга етиб боргунга қадар соғинч, фироқ бекатларини босиб ўтиш лозим. Охирги бекат - дийдор - бу бахт манзилидир.

Моҳигул Қосимованинг ушбу мўъжаз мажмуасида она Ватан, Истиқлол, қишлоқ соғинчи, она меҳри ўзгача муҳаббат, бахт оҳангига қоришиқ ҳолда тараннум этилган.

10 32956
091

К 4702620202-24 24-2006 М.Қосимова, 2006 й.
376(06)2006

ISBN 5-7323-0510-8



ОНАЖОНИМСАН, ВАТАН

Паноҳим, саждагоҳим,
Сенсан гўзал Ватаним.
Меҳрибон, жонажоним,
Онажонимсан, Ватан.

Сенинг азиз номингни,
Севиб тилга олурман.
Гўзал кўркингга боқиб,
Қўшиқ, шеърлар битурман.

ВАТАН ТУЙҒУСИ

Гарчи истасамда унутолмасам,
Шодлигим барибир қайғу бўлғуси.
Сен томон ошиқсам, лек етолмасам,
Қуяр дил шумикан Ватан туйғуси?

Ўзимни бахтиёр кўрмоқ истайман,
Унингсиз тарқамас қалбим қайғуси.
Бу қандай ҳиссиёт экан, билмайман,
Балки, шумикан Ватан туйғуси?

Ёдимдан кетмагай туғилган жойим,
Онамнинг дуоси, синглим кулғуси.
Меҳрибон одамлар мен билан доим,
Мен билан биргадир Ватан туйғуси.

У менинг буюк бойлигим эрур,
Ҳам севгим, юпанчим, қалбим ойнаси.
Фахримдир, ғурурим, қалбдаги сурур,
Мени инсон этган Ватан туйғуси.

МУСТАҚИЛЛИК

Юртимга озодлик келтирган ўзинг,
Қалбларда мангудир истиқлол сўзинг.
Мадҳингга шеър битгай ўғил ва қизинг,
Бахтим камолисан эй, Мустақиллик,
Кўнгил жамолисан эй, Мустақиллик.

Бир ёнда ҳилпирар юртим байроғи,
Герб бизга азиздир, кўзим қароғи.
Таърифин сўзласанг йўқдир адоғи,
Бахтим камолисан эй, Мустақиллик,
Кўнгил жамолисан эй, Мустақиллик.

Жажжи болакай ҳам истиқлол дегай,
Боболар, момолар дуосин бергай.
Ёшларинг юртим деб кўксини кергай,
Бахтим камолисан эй, Мустақиллик,
Юртим жамолисан эй, Мустақиллик.

Мустақиллик оқ кабутардир,
Парвозига ҳасад қилар ким?
Ғаюр балки қафас тутадир,
Йўлларига банд қўяр балким.
Мустақиллик - жажжи чақалоқ,
У ҳам албат улғаяр бир кун.
Аммо ўша жажжи гўдақдан,
Завқ олади ўзгача ҳар ким.
Мустақиллик - чеки йўқ уммон,
Сузавергин бахт оғушида.
Фақат дўстим, ёмон инсоннинг,
Ёвузликлар бордир ичида.
Мустақиллик - хурлик, озодлик,
Оҳ, нақадар жозибадорсан.
Сен қалбларни тўлдирган шодлик,
Ўғил-қизга ғурур ва орсан.

БАХТ

Дунёда тинчлик бўлса,
Қалбимиз завққа тўлса.
Қуёш чарақлаб турса,
Бундан ортиқ бахт борми?!

Ватанни куйга қўшиб,
Куйласак гўзал қўшиқ.
Ўйнасак жўшиб-жўшиб,
Бундан ортиқ бахт борми?!

Истиқлолни куйласак,
Яхшилиқни ўйласак.
Орзулардан сўйласак,
Бундан ортиқ бахт борми?!

ОРЗУ, СЕН БЎЛМАСАНГ...

Орзу, сен бўлмасанг яшолмайман мен,
Ҳаёт сўқмоқларидан ошолмасдим мен.
Денгиздек мавжланиб тошолмасдим мен,
Орзу, сен бўлмасанг яшолмасдим мен.

Сен дилни ёқувчи гулхан, оловсан,
Сафарга отлансам ишон, яловсан.
Армонли қалбимни ёққан қаловсан,
Орзу, сен бўлмасанг яшолмасдим мен.

Қалбимнинг тўрида ўзинг порлайсан,
Учақол, уч, дея қанот боғлайсан.
Эзгу амалларга мағрур чорлайсан,
Орзу, сен бўлмасанг яшолмасдим мен.

ОНА СОФИНЧИ

Онажон, меҳр булоғимисиз,
Ё азим дунёнинг гулбоғимисиз,
Сара туйғуларим ўчоғимисиз,
Сиз томон не учун талпинар дилим?

Мен учун томчимас, денгиз ўзингиз,
Куёш нурларига тенгсиз ўзингиз,
Дунё қучоғидай кенгсиз ўзингиз,
Онажон, сиз томон талпинур дилим.

Ҳар бир нафасимсиз, ҳаётим менинг,
Куйлаган куйим-у, баётим менинг,
Суянган суянчим - нажотим менинг,
Онажон, сиз томон талпинур дилим.

Кўзлари йўлимга нигоронгинам,
Атрофимда капалак - гирёнагинам,
Кибру-ҳаволардан бегонагинам,
Ҳар лаҳза сиз томон талпинур дилим.

Ҳаётим, жоним-ла гулдек асрайин,
Кўзимга тўтиё нурдек асрайин,
Фотима онасиз, улдек асрайин,
Онажон, сиз томон талпинар дилим.

ОНАМГА

Онажон, бу кун бардош йўқ менда,
Сиздан олисларда яшамоқ учун.
Бир учкун аланга олажак дилда,
Ўтинчим, қизингиз бир бора қучинг.

Онажон, меҳрингиз қўмсаб гоҳида,
Телбадек юлдузга айтаман дардим.
Хатто юлдузларнинг минг бир оҳида,
Бунчалик соғинчни сезмади қалбим.

Соғинч исканжага олажак яна,
Мурувват кўрсатмоқ истамагай ҳам.
Ёлғизлик куйини чалиб мардона,
Ғаму андуҳларин ёғдирар олам.

Майли, мен чидайман бунинг барига,
Ҳаёт ҳам ҳақорат этаверсин кўп.
Бир куни бораман онам бағрига,
Ҳозирча мен унга ёзаман мактуб.

Ҳозирча яшайман орзуларим-ла,
Баъзида аламдан куйлайман қўшиқ.
Ўтмишим қолажак қайғуларимда,
Энди бўлолмагай ҳаёт ҳам тўсиқ.

Ҳамманинг қўлида даста-даста гул,
Барчаси қутламоқ истар онасин.
Мен эса айрилиқ домига маҳкум,
Онам ҳам кутади ожиз боласин.

Қўшиқлар янграгай шодлик ўртада,
Қувончдан ҳаприқиб тошади диллар.
Қашқадарё деган олис ўлкага,
Менинг саломимни етказинг, йиллар.

Кўкдаги юлдуз ҳам чақнагай нурсиз,
Титроқ қўллари-ла битажак ашъор.
Менинг тилагимни эшитиб юлдуз,
Ўтинчим, онамни қутлаб қўй бир бор.

Онажон, биз яна бирга бўламиз,
Кўкдаги юлдуз ҳам қилажак ҳавас.
Сизни мадҳ этмоққа тилларим ожиз,
Онажон, бахтимга соғ юрсангиз бас.

ҚИШЛОҒИМНИ СОҒИНИБ

Кенг яёв даштларни соғиниб зор-зор,
Ҳар чоқ қучоғингга талпинар дилим.
Сенинг таърифингни қилмоққа бир бор,
Қанча интилсамда ожиздир тилим.

Кўркам боғларингда сайраб булбуллар,
Ариқларда оқар тиниқ зилол сув.
Гуллар ифоридадан яйраб кўнгиллар,
Қишлоғим қизлари барчадан сулув.

Она қишлоғим дея фахр этарман,
Фарзандлари ботир, ўткирдир зехни.
Сенга атаб шеърлар битарман,
Мен учун муқаддас қишлоғим меҳри.

Лойли кўчаларинг соғиниб зор-зор,
Бепоен бағрингга талпинур дилим.
Қишлоғим, мадҳингни куйлағум минг бор,
Минг бора номингни такрорлар тилим.

НОМИНГИЗ АБАДИЙ

Сариосиёда халок бўлганлар хотирасига

Ўзбекистон обод бўлсин дедингиз,
Ватанга жонингиз фидо қилдингиз,
Ватанпарвар жасур йигит бўлдингиз,
Номингиз абадий яшар Ватанда.

Бу фақат мардларга хос хислат эрур,
Бизлар, сизлар билан қиламиз ғурур.
Энди тинч, кўркмасдан яшаймиз мағрур,
Номингиз абадий яшар Ватанда.

Эрта сўнган ёруғ юлдуз бўлдингиз,
Ким билади неча ёшга кирдингиз,
Ёш ниҳолдек жуда эрта сўлдингиз,
Номингиз абадий яшар Ватанда.

Хатто эзилган-ку Бобурдек аждод,
Ботирлик аслида йигитларга ёд,
Сизни унутмайди келажак авлод,
Номингиз абадий яшар Ватанда.

ЮЛДУЗ

Ҳайрат денгизига чўмди болалик,
Нурли из қолдириб учсанг гар бир ён.
Гўё қўшни боққа бизни қидириб,
Ўтгандай бўлардинг, ишондим ҳар он.

Садоқат туйғуси тарк этмас мени,
Сени мадҳ этмади қанча-қанча сўз.
Менинг ҳам умидим сен каби порлоқ,
Юртим осмонида яшнаган юлдуз.

Илк бора кўрганда сени ўйладим,
Мусаффо осмонда учган бир қушча.
Мендан жуда-жуда йироқда эдинг,
Нурлари зулматни ёққан юлдузча

АБДУЛЛАТИФГА ДЕГАНЛАРИМ

Темурнинг руҳини безовта қилдинг,
Бечора онангнинг бағрини тилдинг,
Тахт учун чин дилдан шимариб сен енг,
Душманни ўзингга дўст дея билдинг.

Ёмонлик тошини отди одамлар,
"Эҳ, сендек ўғилга лаънат", дедилар.
Оллоҳдан инсоф сўрар, бибим, момомлар,
Падаринг ҳолини ўйлади шомлар.

Ахир сиз ёмонни яхши биласиз,
Нечун улуғ зотга душман бўласиз?
Қаҳратонда ўсган гулдек сўласиз,
Энди Самарқандда қандай юрасиз?

ЯНГИ ЙИЛ

Янги йил, янги ой, янги орзумиз,
Янги бахт, янги тахт, янги қувончим.
Янги йил, янги кун, янги ўз сўзим,
Янгича келажак, янги қуёшим.

Янги йил уйимга бўласан меҳмон,
Ўртада туради яшил арчамиз.
Шодлигим чеки йўқ, ўйнаймиз шодон,
Севиниб куйлаймиз сени барчамиз.

Сен билан хайрлашиш фурсати етди,
Омадли йил бўлсин янги йилимиз.
Вафосиз бу йил ҳам ташлади-кетди,
Янгича қувончга тўлсин дилимиз.

БАҲОР КЕЛИБДИ

Оппоқ қор тагида бир гул унибди,
Сайроқи кушлар ҳам буни билибди.
Бу баҳор ҳавоси, байрам навоси,
Дўстларим, юртимга баҳор келибди.

Қир-адир, яйловлар гўзал бўлибди,
Анхорлар зилолдек сувга тўлибди.
Лолалар баҳорни байрам қилибди,
Мисоли келинчак баҳор келибди.

Юр энди, баҳорга чиқайлик пешвоз,
Қарагин, булбуллар куйлар хушовоз.
Қўнгилдан ўчириб қиш озорини,
Баҳорга атайлик дилда борини.

НАВРЎЗ КЕЛАР

Офтоб кулиб чиққанда,
Дала-даштга ёққанда,
Шарқираб сув оққанда,
Наврўз келар юртимга.
Кушлар қилганда хониш,
Далада бошланар иш,
Фунча очилса қизғиш,
Наврўз келар юртимга.
Пиширилса сумалак,
Эриб кетса яхмалак,
Қизлар тақса жамалак,
Наврўз келар юртимга.
Қизлар лапар айтганда,
Юртга баҳор қайтганда,
Қуёш нурын сочганда,
Наврўз келар юртимга.

Ўйнасақ биз болалар,
Тоғда ўсса лолалар,
Сомса ёпса оналар,
Наврўз келар юртимга.

ЁМҒИР

Олам ғуборин ювмоққа шайдир,
Йиғлагай балким, жони-да оғрир.
Телбадек нотаниш жойларда дайдир,
Ёғади, ёғади, ёғади ёмғир...

Бировнинг сирини этганича фош,
Ўзи мароқ билан шивирлар қўшиқ.
Бечора чидолмай тўкканича ёш,
Ёғади, ёғади, ёғади ёмғир...

Кимгадир гулдаста тутганда баҳор,
Ул секин дуторин чала бошлайди.
Қайгадир шошиб оққанда анҳор,
Ёмғир томчиларин аста ташлайди.

Чархнинг гардишидан ўтолмагандек,
Инсоннинг яхшиси, ёмони бордир.
Бир зумда кўтариб шовқин, тўполон,
Ёғади, ёғади, ёғади ёмғир...

Чизмоқ истагайдир олам суратин,
Билмадим, не керак унга бу сурат.
Кўз-кўз қилганича ушбу хислатин,
Ёғади, ёғади, ёғади ёмғир...

Қуёш табассумни канда қилмайди,
Оламни тўлдирар яна чиройга.
Ўйнайди, куйлайди сира тинмайди,
Ёғади, ёғади, ёғади ёмғир...

Хаёт абадиймас, тугайди бир кун,
Кўз ёшсиз кўзлар ҳам йиғлайди ахир.
Бу дунё уйида меҳмондирмизким,
Кўз ёшин артганча тинади ёмғир,

Тинади, тинади, тинади ёмғир.

ХАЁЛ

Хаёл,
Алдамчи хаёл.
Осмонларга учамиз девдинг,
Булутларни қучамиз девдинг,
Сўнг иккимиз ёлғиз қолганда,
Ишқ шаробин ичамиз девдинг.

Хаёл,
Эй ширин хаёл.
Менга эрмак битта сен эдинг,
Бирозгина умид ҳам бердинг,
Энди, секин қучмоқчи бўлсам,
Ўз бошингни ўзгинанг единг.

Хаёл,
Адашган хаёл.
Орзуларим бепичоқ сўйдинг,
Аҳволимга на ачиндинг, на куйдинг,
Уммонингга ғарқ қилиб секин,
Ўшал замон хатоликка йўл қўйдинг.

Хаёл,
Бевафогинам,
Ўйламабман ташлаб кетишинг.
Ёлғон экан шеърлар битишинг,
Асли сенга мен эрмак эдим,
Энди гумон экан қайтишинг.

Хаёл,
Саргардонгинам,
Не юртларни кезмадинг-а сен,
Алдаганим сезмадинг-а сен,
Ҳақиқатни билсангда ҳамон,
Умидингни узмадинг-а сен.

Хаёл,
Дугонагинам.
Икки телба, икки Лайлимиз,
Иккимиз ҳам бирдек дайдимиз,
Ёлғон эди битта айбимиз.

Хаёл,
Собиқ дугонагинам,
Хаёл,
Энди бегонагинам.

ЮРАГИМ

Жафокаш дўстимсан, митти юрагим,
Кўнгил уйи дерлар сени яхшилар.
Шеърларим ҳам сенда туғилар балки,
Сенга ошно эрур, билдим, бахшилар.

Кун бўйи ҳамроҳим бўлар шиддатинг,
Гоҳ ғамгин, гоҳида ғайратланар тан.
Эзгу амалларга интилсанг ҳар дам,
Сен билан фаҳрга чулғанар Ватан.

МУНДАРИЖА

Онажонимсан, Ватан.....	3
Ватан туйғуси.....	3
Мустақиллик.....	4
"Мустақиллик оқ кабутардир.. "	4
Бахт.....	5
Орзу, сен бўлмасанг.....	5
Она соғинчи.....	6
Онамга.....	7
Қишлоғимни соғиниб.....	8
Номингиз абадий.....	9
Юлдуз.....	9
Абдуллатифга деганларим.....	10
Янги йил.....	10
Баҳор келибди.....	11
Наврўз келар.....	11
Ёмғир.....	12
Хаёл.....	13
Юрагим	14

АДАБИЙ-БАДИЙ НАШР

ҚОСИМОВА МОҲИГУЛ

БАХТ ОҒУШИ

Шеърлар

Мухаррир: З.Омонова.
Техник муҳаррир: Ч.Раҳмонов.
Мусахҳих: З.Очилова.
Бадий безорчи: Ж.Норқобилов.

ИБ 1025

Теришга 24.05. 2006 йилда берилди. Босишга 2.06. 2006 йилда рухсат этилди. Бичими 84x108 $\frac{1}{32}$. Шартли босма тобоғи 0,84. Шартли бўёқ-оттиск 0,90. Нашр босма тобоғи 0,58 . 29- 2006-шартнома. 823-буюртма. 100 нусхада. Эркин нархда.

«Насаф» нашриёти, 730018. Қарши шаҳри, Мустақиллик шоҳ кўчаси, 22-уй.

Қашқадарё вилоят Матбуот ва ахборот бошқармаси «Матбаа» цехида чоп этилди.

730018. Қарши шаҳри, Мустақиллик шоҳ кўчаси, 22-уй.